

Dictee 2019 door Bas Quist

## Regelmaet

't Zeêuws voor een pees is een peeze  
Mà toch is 't Zeêuws vò vlees echt geên vleeze  
't Is naemelijk vleis mà Zeêuws vò vrees is geên vreis

't Meervoud vò slot is sloten  
Mà 't meervoud van pot is geênszins poten  
't Raore is me zègge wè sloten  
Behalve tegen een dulleve dan is 't ineêns sloôten

Een Hollandse kat is voor ons een katte  
Mà tegen een vat zègge m'n geên vatte

Een vervoegieng vò 't woord zoeke is ik zocht  
Mà bie vloeke 'oôr in de verleeie tied nie ik vlocht  
't Veugeltje mus is voor ons een mosse  
Mà een bus is noôit vertaeld a's bosse

De kaai noeme wij natuurlijk de kaoie  
Mà een haai bluuf een haai en geên haoie  
Een wijf is geên wief een wijf is een wuuf  
Vijf is geên vief mà noeme m'n vuuf  
Toch is je lijf in 't Zeêuws je lief en echt nie je luuf

Bie roepe 'oôr riep mà bie snoepe geên sniep  
Bie loape 'oôr liep mà bie koape geên kiep

Gapen noeme ons geween gaepe  
Mà apen bin op Thole toch geên aepen?  
Me zègge aoltied aopen net a's tegen hopen  
Hopen met apen bin dus 'oopen mee aopen

En zo kan 'k deurgaen tot Sint-Juttemis  
Mee al dezen onzin die à beslist  
Puur Zeêuws van oorsprong is.